

四庫全書

子部

欽定四庫全書

冊府元龜卷八百二

宋王欽若等撰

總錄部

義第二

魏文聘字仲業南陽宛人也爲劉表大將使禦北方表死其子琮立太祖征荊州琮舉州降呼聘欲與俱聘曰聘不能全州當待罪而已太祖濟漢聘乃詣太祖太祖問曰來何遲邪聘曰先日不能輔弼劉荊州以奉國家

荊州雖沒嘗願據守漢川保全土境生不負於孤弱死無愧於地下而計不得已以至於此實懷悲慙無顏早見耳遂歔歔流涕太祖爲之愴然曰仲業卿真忠臣也厚禮待之

荀彧素爲何顥所善顥爲董卓收顥繫獄自殺後彧爲尚書令遣人迎叔父司空爽喪使并置顥屍而葬之於爽塚傍

華歆字子魚平原人少以高行顯名避西京之亂與同

志鄭泰等六七人間步出武關道遇一丈夫獨行願得
俱北衆欲許之歆獨曰不可今已在危險之中禍福患
害義猶一也無故受人不知其義既已受之若有進退
可中棄乎衆不忍卒與俱行此丈夫中道墮井皆欲棄
之歆曰已與俱矣棄之不義相率共還出之而後別去
衆乃大義之後至太尉

袁渙陳郡人蜀先主初爲豫州舉渙茂才後渙爲呂布
所拘留布初與先主和親後離隙布欲使渙作書罵辱

先主渙不可再三強之不許布大怒以兵脅渙曰爲之則生不爲則死渙顏色不變笑而應之曰渙聞唯德可以辱人不聞以罵使彼固君子邪正不耻將軍之言彼誠小人邪將復將軍之意則辱在此不在於彼且渙他日之事劉將軍猶今日之事將軍也如一旦去此復罵將軍可乎布慙而止後至郎中令

毛玠字孝先雖居顯位嘗布衣蔬食撫育孤兄子甚篤賞賜以賑施貧族家無所餘後至尚書僕射

賈達河東襄陵人爲絳邑長郭援之攻河東所經城邑皆下達堅守之絳既潰援捕得達達不肯拜謂援曰王

府君臨郡積年

臣欽若等曰王府君謂河東太守也史失其名

不知足下何爲

者也援怒曰促斬之諸將覆護乃囚於壺關閉著土窖中以車輪蓋上使人固守方將殺之達從窖中謂守曰此間無健兒耶而當使義士死此中乎時有祝公道者與達非故人而適聞其言憐其守正危厄乃夜盜往引出折械遣去不語其名姓後至豫州刺史

司馬朗河內溫人歲大饑人相食朗收恤宗族教訓諸弟不爲哀世解業後至兗州刺史

任俊河南中牟人爲典農中即將於饑荒之際收恤其友孤遺中外貧宗周急繼乏信義見稱

王修字叔治年二十遊學南陽止張奉舍奉舉家得疾病無相視者脩親隱恤之病愈乃去北海相孔融召爲主簿舉孝廉以天下亂不行頃之郡中有反者言孔融有難夜往奔融賊初發融謂左右曰能冒難來者唯王

修耳言終而修至復署功曹融每有難修雖休歸在家無不即至融嘗賴修以免袁譚在青州辟修爲治中從事袁紹死譚尚有隙尚攻譚譚軍敗修率吏民往救譚譚喜曰成吾軍者王別駕也譚之敗劉詢起兵潞陰諸城皆應譚歎息曰今舉州皆叛豈孤之不德邪修曰東萊太守管統雖在海表此人不反必來後十餘日統果棄其妻子來赴譚妻子爲賊所殺譚更以統爲樂安太守太祖既破冀州譚又叛太祖遂引軍攻譚於南皮修

時運糧在樂安聞譚急將所領兵及諸從事數十人往
赴譚至高密聞譚死下馬號哭曰無君焉歸遂詣太
祖乞收葬譚屍太祖欲觀修意默然不應修曰受袁
君恩厚若得收斂譚屍然後就戮無所恨太祖嘉其
義聽之以脩爲督軍糧還樂安譚之破諸城皆服唯
管統以樂安不從命太祖命修取統首修以統亡國
之忠臣因解其縛使詣太祖太祖悅而赦之後至太
常

田疇右北平無終人幽州牧劉虞奉使至長安致命得報馳還未至虞已爲公孫瓚所害疇至乃於虞墓陳發章表哭泣而去瓚聞之大怒購求護疇謂曰汝何自哭劉虞墓而不送章報於我也疇答曰漢室衰頽人懷異心唯劉公不失忠節章報所言於將軍未美恐非所樂聞故不進也且將軍方舉大事以求所欲既滅無罪之君又讎守義之臣誠行此事則燕趙之士將皆蹈東海死耳豈忍有從將軍者乎瓚壯其對釋不誅也拘之軍

下禁其故人莫得與通或說瓚曰田疇義士君弗能禮而又囚之恐失衆心瓚乃縱遣疇疇得北歸率宗族入徐無山中袁紹死其子數遣使招命又即授將軍印因安輯所統疇皆拒不留紹死其子尚又辟焉疇終不行後遼東斬送袁尚首令三軍敢有哭之者斬疇以嘗爲尚所辟乃往弔祭太祖亦不問後至議郎

曹真爲大司馬少與宗人曹遵鄉人朱瓚並事太祖遵瓚早亡真愍之乞所分食邑封遵瓚子詔曰大司馬有

叔向撫孤之仁篤晏平久要之分君子成人之美聽分
真邑賜尊瓚子爵關內侯各百戶

崔琰字季珪清河東武成人也少樸訥好擊劍尚武事
琰友人公孫方早卒琰撫孤息若己子後至中尉

臧霸字宣高泰山華人也黃巾起霸從陶謙擊破之後
歸太祖太祖以霸爲瑯邪相初太祖之在兗州以徐翕
毛暉爲將兗州亂翕暉皆叛後兗州定翕暉亡命投霸
太祖語蜀先主令語霸送二人首霸謂先主曰霸所以

能自立者以不爲此也。霸受公生成之恩，不敢違命。然王霸之君可以義告，願將軍爲之辭。先主以霸言白太祖，太祖歎息謂霸曰：「此古人之事，而君能行之，孤之願也。」乃以翕暉皆爲郡守。

龐涓字子異，初以涼州從事守破羌，長會武威太守張猛反，殺刺史邯鄲商猛，令曰：「敢有臨商喪死，不赦。」涓聞之，棄官晝夜奔走，號哭喪所，訖詣猛門，衷匕首，欲因見以殺猛。猛知其義士，勅遣不殺，繇是以忠烈聞。酒泉太

守徐揖請消爲主簿後郡人黃昂反圍城消棄妻子夜
踰城出園告急於張掖燉煌二郡初疑未肯發兵消欲
伏劍二郡感其義遂爲興兵軍未至而郡城已陷揖死
消乃收斂揖喪送還本郡行服三年乃還太祖聞之辟
爲掾

夏侯淵字妙才太祖居家曾有縣官事淵代引重罪太

祖營救之得免

魏畧曰時兗豫大亂饑乏棄其幼子而活亡弟孤女

後至征西將

軍

閻溫字伯儉天水西城人守上邽令馬超奔上邽部人任養等舉衆迎之溫止之不能禁乃馳還州超復圍州甚急州乃遣溫密去告急於夏侯淵賊圍數重溫夜從水中潛出明日賊見其迹遣追遮之得溫執還請超解其縛謂曰今成敗可見若從吾言反謂城中東方無救此轉禍爲福之計也不然今爲戮矣溫僞許之超乃載溫詣城下溫向城大呼曰軍不過三日至勉之超怒數之曰足下不爲命計邪溫曰夫事君有死無貳而公

乃欲令長者出不義之名吾豈苟生者乎超遂殺之

韓珩爲袁紹別駕及袁熙袁尚爲其將焦觸張南所攻奔遼西烏丸觸自號幽州刺史驅率諸郡太守令長背袁尚曹陳兵數萬殺白馬盟令曰違命者斬衆莫敢語各以次軟至珩曰吾受袁公父子厚恩今其破亡智不能救勇不能死於義闕矣若乃北面於曹氏所弗能爲也一坐爲珩失色觸曰夫興大事當立大義事之濟否不待一人可卒珩志以勵事君太祖高珩節屢辟不至

卒於家

成公英金城人。中平末，隨韓遂爲腹心。建安中，遂從華陰破走還。湟中，部黨散去，唯英獨從。

牽招字子經，安平城西人。年十餘歲，詣同縣樂隱受學。後隱爲車騎將軍，何苗長史。招隨卒業，值京都亂，苗隱見害，招與隱門生史路等觸蹈鋒刃，共殞殮。隱屍送喪，還歸道，遇寇鈔路等皆悉散走。賊欲斫棺取釘，招垂淚請赦賊，義之乃釋而去。繇此顯名。招既事袁尚，後歸太

祖從討烏丸至柳城拜護烏丸校尉還鄴遼東送袁尚首縣在馬市招覩之悲感設祭頭下太祖義之

夏侯惇字元讓沛國譙人年十四求師就學人有辱其師者惇殺之繇是以烈氣聞後至大將軍

邢顥爲廣宗長以故將喪棄官有司舉正太祖曰顥篤於舊君一致之節勿問也

嘗林河內人漢末以太守酷虐乃避地上黨耕種山阿當時旱蝗林獨豐收盡呼比鄰升斗分之後至光祿大

夫

趙儼字伯然潁川陽翟人漢末避亂荊州與杜襲繁欽通財同計合爲一家後至司空

楊俊漢末以兵亂方起而河內處四達之衝必爲戰場乃扶持老弱詣京密山間同行者百餘家俊賑濟貧乏通共有無宗族知故爲人所畧作奴僕者凡六家俊皆傾財贖之本郡王象少孤特爲人僕隸年十七八見使牧羊而私讀書因被箠楚俊嘉其才質即贖象著家聘

娶立屋然後與別後至南陽太守

高慎字孝甫敦厚少華有沈深之量撫育孤兄子五人

恩義甚篤瑯邪相何英嘉其行履以女妻焉

按慎魏高柔六代祖

後漢人

孫禮爲太祖司空軍謀掾初喪亂時禮與母相失同郡馬台求得禮母禮推家財盡以與台台後坐法當死禮私導令踰獄自首既而曰臣無逃亡之義徑詣刺奸主簿溫恢恢嘉之具白太祖各減死一等

梁習字子虞初濟陰王思與習俱爲太祖丞相西曹令史思因直日白事失太祖旨太祖大怒教召主者將加重辟時思近出習代往對已被收執矣思乃馳還自陳己罪罪應受死太祖歎習之不言思之職分曰何意吾軍中有二義士乎

脂習字元升與少府孔融親善太祖爲司空威德日盛而融故以舊意書疏倨傲習嘗責融故令改節及融被誅當時許中百官先與融親善者莫敢收恤而習獨往

撫而哭之曰文舉卿捨我死我當復與誰語者哀歎無已太祖聞之收習欲理之尋以其事直見原從許東土橋下習後見太祖陳謝前愆太祖呼其字曰元升卿故慷慨因問其居處以新移徙賜穀百斛至黃初詔欲用之以其年老然嘉其敦舊有樂布之節賜拜中散大夫還家年八十餘卒

郭憲西平人以仁篤爲一郡所歸韓約失衆從羗中還依憲衆人多欲取約以徼功而憲皆責怒之言人窮來

歸我云何欲危之遂擁護厚遇之其後約病死而田樂陽達等就斬約頭當送之達等欲條疏憲名憲不肯在名中言我尚不忍生圖之豈忍取死人以要功乎達等乃止時太祖方攻漢中在武都而達等送約首到太祖宿聞憲名及視條疏怪不在中以問達等達具以情對太祖歎其忠義乃并表列與達等並賜爵關內侯繇是名震隴右黃初中病卒建始初追嘉其事復賜其子爵關內侯

王朗漢末爲會稽太守爲孫策所執雖流移窮困朝不謀夕而收恤親舊分多割少行義甚著少與南國名士劉陽交友陽爲莒令年未三十而卒故後世鮮聞初陽以漢室漸衰知太祖有雄才恐爲漢累意欲除之而事不會及太祖貴求其嗣子甚急其子惶窘走伏無所陽親舊雖多莫敢藏者朗乃納受積年及從會稽還又數開解太祖久乃赦之陽門戶繇是得全

袁侃明帝時與尚書選曹郎許允對直同坐職事皆收

送獄詔旨嚴切當有死者正直者爲重允謂侃曰卿功臣之子法應入議不憂死侃知其指乃爲受重允刑竟復吏侃復歷郡守尚書

諸葛誕爲郎與僕射杜畿試船陶河遭風覆沒誕亦俱溺虎賁浮河救誕誕曰先救杜侯誕飄於岸絕而後蘇皇甫晏者王經之故吏經之死刑及其母晏以家財收葬

蜀許靖漢末補御史中丞時董卓秉政靖懼誅奔豫州

刺史孔佃卒依揚州刺史陳祿禕死吳郡都尉許貢會稽太守王朗素與靖有舊故往保焉靖收恤親理經紀賑贍出於仁厚孫策東渡江皆走交州以避其難靖身坐岸邊先載附從踈親悉發乃從後去當時見者莫不歎息姜同維父也天水真人同昔爲郡功曹值羗戎叛亂身衛郡將沒於戰場賜維官中郎叅本郡軍事

程畿巴西閬中人爲益州牧劉璋漢昌長縣有賓人種類剛猛昔高祖以定關中巴西太守龐義以天下擾亂

郡宜有武衛頗招合部曲有讒於璋說義欲叛璋陰疑之義聞甚懼將謀自守遣畿子郁宣旨索兵自助畿報曰郡合部曲本不爲叛雖有交構要在盡誠若必以懼遂懷異志非畿之所聞并勅郁曰我受州恩當爲州牧盡節汝爲郡吏當爲太守効力不得以吾有異志也義使人告畿曰爾子在郡不從太守家將及禍畿曰昔樂羊爲將飲子之羹非父子無恩大義然也今雖復羹子吾必飲之義知畿必不爲己厚陳謝於璋以致無咎璋

聞之遷畿江陽太守

王連字文儀爲劉璋梓潼令先主起事葭萌進軍南來連閉城不降先主義之不彊偏也

張嶷字伯岐巴西郡南充國人弱冠爲縣功曹先主定蜀之際山寇攻縣縣長捐家逃亡嶷冒白巾携負夫人夫人得免繇是顯名爲州從事得疾病困篤家素貧置廣漢太守蜀郡何祗名爲通厚嶷宿與疎濶乃自舉詣祗託以治病祗傾財醫療數年除愈

關羽爲先主守下邳城行太守事曹公東征擒羽以歸拜爲偏將軍禮之甚渥曹公壯羽爲人而察其無久留意謂張遼曰卿試以情問之遼以問羽羽歎曰吾極知曹公待我厚然吾受劉將軍恩誓以共死不可背之吾終不留吾要當効力以報曹公而後乃歸遼以羽言報曹公公曰事君不忘其本天下義士也度何時去遼曰受公恩必効力而後去也及羽殺顏良曹公知其必去重加賞賜羽盡封其賞賜拜書告辭而奔先主左右欲

追之曹公曰彼爲其主勿追也

楊戲篤於舊故居誠存重與巴西韓儼黎韜童幼相親
厚後儼痼疾廢頓韜無行見捐戲經紀賑恤恩好如初
卒於射聲校尉

譙周字允南丞相諸葛亮領益州牧以周爲勸學從事
亮卒於敵庭周在家聞即便奔赴尋有詔書禁斷惟周
以速行得達

張裔字君嗣少與犍爲楊恭友善恭早死遺孤未數歲

喬迎留與分屋而居事恭母如母恭之子息長大爲之
娶婦買田宅產業使立門戶撫恤故舊賑贍衰宗行義
甚篤後至輔漢將軍丞相長史

吳桓階字伯緒長沙臨湘人仕郡功曹太守孫堅舉階
孝廉除尚書郎父喪還鄉里會堅擊劉表戰死階冒難
詣表乞堅喪表義而與之

魏志

高岱字孔文吳郡人太守盛憲以爲上計舉孝廉許貢
來領郡岱將憲避難於許昭家求救於陶謙謙未即救

岱憔悴泣血水漿不入口謙感其忠壯有申包胥之義
許爲出軍以書與貢

虞翻字仲翔會稽餘姚人太守王朗命爲功曹孫策征
會稽翻時遭父喪衰經詣府門朗欲就之翻乃脫衰入
見勸朗避策朗不能用拒戰敗績亡走浮海翻追隨營
護到東部侯官侯官長閉城不受翻往說之然後見納
張紘爲廣陵太守趙昱察孝廉昱後爲笮融所殺紘甚
傷憤而力不能討昱門戶絕滅及紘在東部遣主簿至

瑯邪

趙昱瑯邪人

設祭并求親戚爲之後以書屬瑯邪相臧

宣宣以趙宗中五歲男奉昱祀大帝聞而嘉之

駱統字公緒徐陵卒僮客土田或見侵奪統爲陵家訟之求與丁覽卜清等爲北權許焉後至偏將軍濡須督陸瑁字子璋丞相遜之弟少好學篤義陳國陳融陳留濮陽逸沛郡蔣纂廣陵袁迪等皆單貧有志就瑁遊處瑁割少分甘與同豐約及同郡徐原爰居會稽素不相識臨死遺書託以孤弱瑁爲起立墳墓教導其子又瑁

從父績早亡二男一女皆數歲以還瑁迎攝養之至長
乃別後至選曹尚書

王固字子賤少喪父獨與母居家貧守約色養致敬族
弟孤弱與同寒溫後至司空

陸康字季寧少惇孝悌勤修操行太守李肅察孝廉肅
後坐事伏法康斂屍送喪還潁川行服

吳範爲騎都尉領太史令爲人剛直頗好自稱然與親
故交接有終始素與魏滕同邑相善滕嘗有罪孫權責

怒甚嚴敢有諫者死範謂滕曰與汝偕死滕曰死而無益何用死爲範曰安能慮此坐觀汝邪乃髡頭自縛詣門下使鈴下以聞鈴下不敢曰必死不敢白範曰汝有子邪曰有曰使汝爲吳範死子以屬我鈴下曰諾乃排閣入言未卒權怒欲使投以戟逡巡出走範因突入叩頭流血言與涕並良久帝意釋乃免滕滕見範謝曰父母能生長我不能免我於死丈夫相知如汝足矣何用多焉

臧均臨淮人諸葛恪爲孫峻所殺夷三族均表乞收葬
恪曰臣聞震雷電激不崇一朝大風衝發希有極日然
猶繼以雲雨因以潤物是則天地之威不可經日浹辰
帝王之怒不宜訖情盡意臣以狂愚不知忌諱敢冒破
滅之罪以激風雨之會伏念大傳諸葛恪得承祖考風
流之烈伯叔諸父遭漢祚盡九州鼎立分託三方並履
忠勤熙隆世業爰及於恪生長王國陶育聖化致名英
偉服事累紀禍心未萌先帝委以伊周之任屬以萬幾

之事恪素性剛愎矜己陵人不能敬守神器穆靜邦內
興功暴師未期三出虛耗士民空竭府藏專擅國憲廢
易繇意假刑劫衆大小屏息侍中武衛將軍都鄉侯俱
受先帝囑寄之詔見其姦虐日月滋甚將恐蕩搖宇宙
傾危社稷奮其威怒精貫昊天計慮先於神明智勇百
於荆聶躬持白刃梟恪殿堂勲超朱虛功越東牟國之
元害一朝大除馳首徇示六軍喜踰日月增光風塵不
動斯實宗廟之神靈天人之同駭也今恪父子三首縣

市積日觀者數萬罵聲成風國之大刑無所不震長老
孩幼無不畢見人情之於品物樂極則哀生見恪貴盛
世莫與貳身處台輔中間歷年今之誅夷無異禽獸觀
訖情反能不惜然且已死之人與土壤同域鑿掘斫刺
無所復加願聖朝稽則乾坤怒不極旬使其鄉邑若故
民吏收以五土之服惠以三寸之棺昔項羽受殞葬之
施韓信獲收斂之恩斯則漢高發神明之譽也唯陛下
敷三皇之仁垂哀矜之心使國澤加於辜戮之骸復受

不已之恩於以揚聲遐方沮觀天下豈不宏哉昔樂布
矯命彭城臣竊恨之不先請主上而專名以肆情其得
不誅實爲幸耳今臣不敢章宣愚情以露天恩謹伏手
書冒昧陳聞乞聖朝哀察於是廢帝及峻聽恪故吏歛
葬

徐平字伯先爲諸葛恪從事意甚薄及恪輔政待平益
疏恪被害其子建亡走爲平部曲所得平使遣去別爲
佗軍所獲其行義敦篤嘗此類也

晉安平獻王孚性通恕陳留殷武有名於海內嘗罹罪
譴孚往省之遂與同處分食譚者稱焉

何雄字茂伯河內人初仕郡爲主簿事太守王經及經
之死也雄哭之盡哀市人咸爲之悲後太守吳奮以少
譴繫雄於獄司隸鍾會於獄中辟雄爲都官從事會死
無人殯歛雄迎喪而葬之文帝時爲文王召雄責之曰
往者王經之死卿哭經於東市我不問也今鍾會躬爲
叛逆收葬若復相容其如王法何雄曰昔者先王掩骼

理皆仁流朽骨當時豈先卜其功罪而後葬之哉今王
誅既加於法已備雄感義收葬教亦無關法立於上教
引於下何必使雄違生背死以立於時殿下雖枯骨而
捐之中野爲將來仁賢不亦惜乎帝甚悅與譚宴而遣
之

鄭袤父泰有高名袤早孤隨叔父潭避難江東時華歆
爲豫章太守潭往依之歆素與泰善撫養袤如己子年
十七乃還鄉里後至光祿大夫

荀勗仕魏辟大將軍曹爽掾遷中書通事郎爽誅門生
故吏無敢往者勗獨臨赴衆乃從之

戴顓丹陽人初仕吳廢帝時爲少府帝以廢黜之國道
自殺至晉太康中顓迎亮喪葬之賴鄉

廢帝孫亮也
吳志

樊震爲積射將軍咸寧中爲西戎牙門得見辭武帝問
震所繇進震自陳曾爲鄧艾伐蜀時帳下將帝遂尋問
艾震具申艾之忠言之流涕繇此遷艾孫朗爲定陵令
孫鑠字巨鄴河內懷人少樂爲縣吏太守吳奮轉以爲

主簿鑠自微賤登網紀時僚大姓猶不與鑠同坐奮大怒遂薦鑠爲司隸都官從事司隸較尉劉訥甚知賞之時奮又薦鑠於大司馬石苞苞辟爲掾鑠將應命行達許昌會臺已密遣輕軍襲苞子時汝陰王鎮許鑠過謁之王先識鑠以鄉里之情私告鑠曰無與禍鑠既出即馳詣壽春爲苞畫計苞賴而獲免遷尚書卽在職駁議十有餘事爲當時所稱

劉繇爲衛瓘太保主簿瓘爲楚王偉所害繇冒難收瓘

而葬之

劉僧爲征南大將軍羊祜叅佐初祜開府累年謙讓不
辟士劉僧始有所命會卒不得除署杜預代祜鎮荊州
僧與趙寅劉彌孫勃等賤詣預曰昔以謬選忝備官屬
各得與前征南大將軍祜叅同庶事祜執德冲虛操尚
清遠德高而體卑位優而行恭前膺顯命來撫南夏既
有三司之義復加大將軍之號雖居其位不行其制至
令海內渴佇羣雋望風步其門者貪夫反廉懦夫立志

雖夷惠之操無以尚也自鎮此境政化被乎江漢潛謀遠計闢國開疆諸所規摹皆有軌量志存公家以死勤事始辟四掾未至而隕夫舉賢報國台輔之遠任也搜揚側陋亦台輔之宿心也中道而廢亦台輔之私恨也履謙積稔晚節不遂此遠近所以爲之感痛者也昔召伯所憇愛流甘棠宣子所遊封植其樹夫思其人尚及其樹况生存所辟之士便當隨例放棄者乎乞蒙列上得依已至掾屬預表曰祐雖開府而不備僚屬引謙之

至宜見顯明及扶疾辟士未到而沒家無血嗣官無命士此方之望隱憂載懷夫篤終追遠人德歸厚漢高祖不惜四千戶之封以慰趙子弟心請議之詔不許

何攀字惠興蜀郡人仕州爲主簿屬刺史黃甫晏爲牙門張宏所害誣以大逆時攀適丁母喪遂詣梁州拜表證晏不反故晏寃理得申

段秀實喪父服終推財與兄弟

閻纘字纘伯爲太傅楊駿舍人轉安復令駿之誅也纘

棄官歸要駿故主簿潘岳掾崔基等共葬之基岳畏罪
推纘為主墓成當葬駿從弟模告武陵王澹將表殺造
意者衆咸懼填冢而逃纘獨以家財成墓葬駿而去

荀闓辟大司馬齊王冏掾冏敗暴屍三日莫敢收葬闓
與冏故吏李述稽含等露板請葬朝議聽之論者稱焉
東晉爲尚書郎與衛嘗甚善聞嘗遇禍自本郡迎喪

劉佑爲長沙王又掾又爲東海王越令張方勒兵所殺將
殞於城東官屬莫敢往佑獨送之步持喪車悲號泣絕

哀感路人張方以其義士不之問也

汲桑嘗事成都王穎穎之死也桑載穎棺於軍中每事啟靈以行軍令桑敗棄棺於故井中穎故臣收之改葬於雒陽

桑虞五世同居閨門邑穆爲符堅青州刺史符朗甚重之嘗詣虞家升堂拜其母時人以爲榮

庾袞撫諸孤以慈奉諸寡以仁事加於厚而教之義方使長者體其行幼者忘其孤孤甥郭秀比諸子姪衣食

每先之以舊宅與其長兄子賡翁及翁卒袞哀其早孤痛其成人而未娶乃撫柩長號哀感行路聞者莫不垂涕潁川太守召爲功曹竟不就

汜毓字稚春濟北蘆人也奕世儒素敦睦九族客居青州逮毓七世時人號其家兒無常父衣無常主武帝召補太傅參軍不就

紀瞻有重名尚書閔鴻太常薛兼廣川太守河南褚沉給事中宣城章遼歷陽太守沛國武嘏並與瞻素疎咸

藉其高義臨終託後於瞻瞻悉營護其家爲起居宅同
於骨肉焉少與陸機兄弟親善及機被誅瞻卹其家周
至及嫁機女資送同於所生後至散騎常侍

鄧攸初經難棄其子而以弟子綏奔江東攸卒綏服攸
喪三年子後至尚書右僕射

范廣字仲將舉孝廉除靈壽令值亂不之官姊適孫氏
早亡有孫名邁廣負力南奔雖盜賊艱急終不棄之

王育少勤學太守杜宣命爲主簿俄而宣左遷萬年令

杜令王攸詣宣宣不迎之攸怒曰卿往爲二千石吾所敬也今吾儕耳何故不見迎欲以小雀遇我使我畏死鷄乎育執刀叱攸曰君辱臣死自昔而然我府君以非罪黜降如日月之蝕耳小縣令敢輕辱吾君汝謂吾刀鈍邪敢如是乎前將殺之宣懼跣下抱育乃止自此知名

易雄仕郡爲主簿張昌之亂也執太守萬嗣將斬之雄與賊爭論曲直賊怒叱使牽雄斬之雄趨出自若賊又

呼問之雄對如此如此者三賊乃舍之嗣繇是獲免雄
遂知名

郭舒始爲領軍校尉坐擅放司馬彪繫廷尉獄世多義
之刺史夏侯含辟爲西曹轉主簿含坐事舒自繫理含
事得釋刺史宗岱命爲治中喪母去職劉宏牧荊州引
爲治中宏卒舒率將士推宏子璠爲主討逆賊郭勸滅
之保全一州

祖逖爲濟陰太守母喪不之官及京師大亂逖率親黨

數百人避地淮泗以所乘車馬載同行老疾躬自徒步
藥物衣糧與衆共之又多權畧是以少長咸宗之推遜
爲行主

高悝廣陵人寓居江州華軼辟爲西曹掾尋而軼敗悝
藏匿軼二子及妻崎嶇經年既而遇赦悝携之出首元
帝嘉而宥之

孔祗字承祖太守周禮命爲功曹吏禮爲沈充所害故
人賓吏莫敢近者祗冒办號哭親行殯禮送喪還義興

時人義之

郝鑒值永嘉喪亂在鄉里甚窮綏鄉人以鑒名德傳其
飴之時兄子邁外甥周翼並小嘗携之就食鄉人曰各
自饑困以君賢欲共相濟耳恐不能兼有所存鑒於是
獨往食訖以飯著兩頰邊還吐與二兒後並得存同過
江邁位至護軍翼爲剡縣令鑒之薨也翼追撫育之恩
解職而歸席苦心喪三年後至太尉

華譚字令思廣陵人爲廬江內史在郡政嚴而與上司

多忤揚州刺史劉陶素與譚不善因法收譚下壽陽獄
鎮東將軍周馥與譚素相親善理而出之及甘卓討馥
百姓奔散馥謂譚已去遣人視之而更移近馥馥歎曰
吾嘗謂華令思是臧子源之疇今果效矣甘卓嘗為東
海王越所捕下令敢有匿者誅之卓投譚而免及此後
也卓遣人求之曰華侯安在吾甘揚威使也譚答不知
遺絹二疋以遣之使反告卓卓曰此華侯也覆求之譚
已亡矣

韋宏京兆人喪亂之際親屬遇饑疫並盡客遊雒陽素聞應詹遂依託之詹與分甘共苦情若弟兄遂隨從積年爲營伉儷置居宅并薦之於元帝宏後位至少府卿既受詹生成之惠詹卒遂製朋友之服哭止宿草追趙氏祀程嬰杵臼之義祭詹終身

陶侃爲廬州主簿太守張夔妻有疾將迎醫於數百里時正寒雪諸綱紀皆難之侃獨曰資於事父以事君小君猶母也安有父母之疾而不盡心乎乃請行衆咸服

其義

顧悅之爲中軍將軍殷浩吏及浩廢爲庶人卒後將改葬悅之上疏訟寃詔追復本官初悅之將抗表訟浩浩親故多謂非宜悅之決意以聞又與朝臣爭論故衆無以奪焉時人咸稱之

韓階長沙人性廉謹篤慎爲閭里所敬愛刺史譙王承辟爲議曹祭酒轉西曹書佐及承爲魏人所執送武昌階與武延等同心隨從在承左右桓雄被害之後二人

執志愈固及承遇禍階延親營殯歛送柩還都朝夕哭奠俱葬畢乃還

劉敏元字道光北海人也永嘉之亂自齊西奔同縣管平年七十餘隨敏元而西行及滎陽爲盜所劫敏元已免乃還謂賊曰此公孤老餘年無幾敏元請以身代願諸君舍之賊曰此公於君何親敏元曰同邑人也窮窶無子依敏元爲命諸君若欲役之老不堪使若欲食之復不如敏元乞諸君哀也有一賊瞋目叱敏元曰吾不

放此公憂不得汝乎敏元奮劔曰吾豈望生邪當殺汝而後死此公窮老神祇尚當哀憐之吾親非骨肉義非師友但以見投之故乞以身代諸大夫慈惠皆有聽吾之色汝何有醜面目而發斯言顧謂諸盜長曰夫仁義何嘗寧可失諸君子上當爲高皇光武之事下豈失爲陳項乎當取之繇道使所過稱詠威德奈何容畜此人以損盛美當爲諸君除此人以成諸君霸王之業前將斬之盜長遽止之而相謂曰義士也害之犯義乃俱免

之

何無忌爲東海王彥章中尉及桓玄害彥章於市無忌入市慟哭而出時人義焉

檀憑之從兄子韶兄弟五人皆稚弱而孤憑之撫養若己所生後至冀州刺史

後秦宗敞爲南涼州別駕初涼州刺史王尚在涼州甚有惠政姚興以禿髮傳檀代之尚既至長安坐匿呂氏宮人檀殺逃人等禁止敞與治中張穆主簿邊慮胡威

等上疏理尚曰臣州荒裔鄰帶寇讎居秦無垂拱之安
運否離傾覆之難自張氏頽基德風絕而莫扇呂數將
終梟鴞以之翻翔羣生嬰罔極之痛西夏有焚如之禍
幸皇鑒降眷純風遠被刺史王尚受任垂滅之州策成
難全之際輕身率下躬儉節用勞逸豐約與衆同之勸
課農桑時無廢業然後振王威以掃不庭迴天討以蕩
氛穢則羣逆冰摧不俟朱陽之曜若秋霜墮籜豈待勁
風之威何定遠之足高營平之獨美經始甫爾會朝筭

改授使希世之功不終於必成易失之機踐之而莫展
當其時而明其事者誰不慨然既遠役遐方劬勞於外
雖效未酌恩而在公無闕自至京師一旬于今出車之
命莫逮萋斐之責惟深以取呂氏宮人裴氏及殺逃人
薄禾等爲南臺所禁天鑒元鏡暫免囹圄譏繩之文未
離簡墨裴氏年垂知命首髮二毛廢居本家不在高室
年邁姿陋何用送爲邊藩要捍衆力是寄禾等私逃罪
應憲墨以殺止殺安邊之義也假若以不送裴氏爲罪

者正闕奚官之一女子耳論勲則功重言瑕則過微而
執憲吹毛求疵忘勞記過斯先哲所以泣血於當年微
臣所以仰天而灑淚且尚之奉國歷事二朝能否效於
既在優劣簡在聖心就有微過功足相補宜宏罔極之
施以彰覆載之恩臣等生自西川無翰飛之翼久沉僞
政絕進趨之塗及皇化既霑投竿之心冥發遂策名委
質位忝吏端主辱臣憂故重繭披歎惟陛下亮之興覽
之大悅乃赦尚之罪以爲尚書



冊府元龜卷八百二

欽定四庫全書

子部

冊府元龜卷八百三
六

詳校官中書臣孫球

侍讀臣孫球覆勘

總校官庶吉士臣何思鈞

校對官主簿臣汪日贊

謄錄監生臣張鴻恕

欽定四庫全書

冊府元龜卷八百三

宋 王欽若等 撰

總錄部

義第三

晉馬隆字孝興少而智勇好立名節魏末兖州刺史令
狐愚坐事伏誅舉州無敢收者隆以武吏託稱過客以
私財殯葬服喪三年列植松柏禮畢乃還一州以爲美
談署武猛從事後至東羌較尉

邵續字嗣祖魏郡人段疋碑爲從弟末杯所敗北依續
末杯又攻敗之疋碑被瘡謂續曰吾夷狄慕義以至破
家君若不忘舊要與吾追討君之惠也續曰賴公威德
續得效節今公有難豈敢不俱遂并力追末杯斬獲畧
盡後進平北將軍假節封祝阿子

徐苗高密淳于人鄉鄰有死者便輟耕助營棺柳門生
亡於家即斂於講堂其行已純至類皆如此遠近咸歸
其義師而行焉徵辟並不就

范廣者范隆之踈族也隆幼孤無總功之親廣愍而養

之迎歸教書爲立祠堂隆好學脩謹奉廣如父

廣史不
載官

韋忠平陽人太守陳楚迫爲功曹會山羗破郡楚攜子
出走賊射之中三創忠冒办伏楚以身捍之泣曰韋忠
願以身代君乞諸君哀之亦遭五矢賊相謂曰義士也
舍之忠於是負楚以歸

桓冲字幼子溫之弟也爲振武將軍鎮江州卒贈太尉
初郗鑒庾亮庾翼臨終皆有表樹置親戚惟冲獨與謝

安書云妙靈靈寶尚小亡兄寄託不終

臣欽若等曰妙靈靈寶即桓溫

二子偉元別名也

以此爲恨言不及私論者益嘉之

劉麟之字子驥車騎將軍桓仲辟長史不受麟之雖冠冕之族信義著於羣小凡廝五之家婚娶葬送無不躬自造焉居于陽岐在官道之側人物來往莫不投之麟之躬自供給士君子頗以勞累更憚過焉凡人致贈一無所受去麟之家百餘里有一孤姥疾將死歎息謂人曰誰當理我惟有劉長史耳何繇令知麟之先聞其有

患故徃候之值其命終乃身爲棺殯送之其仁愛隱惻
若此卒以壽終

孫畧吳國富春人見人饑寒並周贍之親有窮老者數
人嘗徃來告索人多厭慢之而畧見之欣敬逾甚寒則
與同衾食則與同器或解衣推被以恤之公車徵會卒
朱綽有二兄憲斌俱爲西中郎袁貞所殺綽從桓溫平
壽陽真時已死輒發棺戮屍溫怒將斬之溫弟冲苦請
得免綽爲人忠烈受冲更生之恩事冲如父叅冲車騎

軍事西陽廣平太守及冲薨綽嘔血死冲諸子遇綽子
齡石亦如兄弟

前燕李績范陽人父產任於石民爲本郡太守績爲郡
功曹刺史王午辟爲主簿慕容儁之南征也隨午奔魯
口鄧嘗謂午績鄉里在北父已隆燕今雖在此終不爲
用方爲人患午曰績於喪亂之中捐家立義情節之重
有侔古烈若懷嫌害之必駭衆望嘗乃止午恐績終爲
嘗所害乃資遣之及到雋責其背親後至績答曰臣聞

豫讓報知伯仇稱於前史既官身所在何事非君陛下
方宏唐虞之化臣實未謂歸順之晚也雋曰此亦事主
之一節耳

宋俞僉永嘉人爲郡吏晉末孫恩之亂太守司馬逸之
被害妻子並死兵寇之際莫敢收藏僉以家財買棺斂
逸之等六喪送致還郡墓畢乃歸鄉里元嘉中老病卒
王宏晉末爲司馬道子驃騎將軍時桓玄尅京邑收道
子付廷尉臣吏畏恐莫敢瞻送宏時尚在喪獨於道側

拜攀車涕泣論者稱焉

何叔度恭謹有行業姨適沛郡劉璩與叔度母早卒奉
姨有若所生姨亡朔望必往致哀並設祭奠食並珍新
躬自臨視若朔望應有公事則先遣送祭皆手自料簡
流涕對之公事畢即往致哀以此爲常至三年服竟

張邵字茂宗初爲瑯琊內史王誕龍驤府功曹桓玄徙
誕於廣州親故咸離棄之惟邵情意彌謹流涕追送時
變亂饑饉又饋送其妻子

朱齡石晉末爲殿中將軍嘗追隨桓脩兄弟爲脩撫軍
參軍在京口高祖克京城以爲建武參軍從至江乘戰
齡石言於高祖曰世受桓氏厚恩不容以兵刃相向乞
在軍後高祖義而許之

朱超石晉末爲衛將軍桓謙行參軍後歸高祖謙死超
石收迎桓謙身首躬營殯葬

龔穎少好學益州刺史毛璩辟爲勸學從事璩爲譙縱
所殺故佐吏並逃亡穎號哭奔赴殯送以禮縱後設宴

延頴不獲已而至樂奏頴流涕起曰北面事人亡不能
死何忍聞舉樂蹈跡逆亂乎縱大將譙道福引出將斬
之道福母即頴姑跳出救之故得免

崔慰祖父慶緒爲梁州刺史父亡梁州之資家財千萬
散與宗族漆器題爲日字日字之器流乎遠近後得父
時假貸文疏謂族子絃曰彼有自當見還彼無吾何言
哉悉火焚之

王曇首有識局智度喜怒不見於色閨門之內雍雍如

也兄弟分財曇首惟取圖書而已後爲侍中驍騎將軍
謝弘微從叔峻無後以弘微爲嗣所繼叔父混義熙八
年以劉毅黨見誅妻晉陵公主改適瑯琊王練公主雖
執意不行而詔與謝氏離絕公主以混家事委之弘微
混累世相輔一門兩封田業十餘處僮僕千人惟有二
女年數歲弘微經紀生業正若在公一錢尺帛出入皆
有文簿遷通直郎高祖受命晉陵公主降東鄉君以混
得罪前代東鄉君節義可嘉聽還謝氏自混亡至是九

載而室宇修整倉廩充盈門徒僕使不異平日田疇墾闢有加於舊東鄉君嘆曰僕射平生重此子可謂知人僕射爲不亡矣中外姻親道俗義者見東鄉之歸者入門莫不嘆息或爲流涕感弘微之義也後至侍中

張暢吳郡人起家爲太守徐佩之主簿佩之被誅暢馳出奔赴制服盡哀爲論者所美

沈道處冬月無複衣戴顓聞而迎之爲作衣服并與錢一萬及還分身上衣及錢悉供諸兄弟子無衣者鄉里

年少相率受學道處嘗無食以立學徒武康令孔頴之厚相資給受業者咸得有成文帝聞之遣使存問賜錢三萬米三百斛悉供孤兄子嫁娶徵負外散騎侍郎不就

范義爲竟陵王誕別駕誕舉兵反母妻子並在城內有勸義出降義曰我人吏也豈可自求活耶誕敗被誅

蔡興宗字子度幼立風概家行尤謹奉宗姑事寡嫂養孤兄子有聞於世太子左率王錫妻范聰明婦人也有

才學與錫弟僧達書詰讓之曰昔謝太傅奉嫂王夫人如慈母今蔡興宗亦有恭和之稱其爲世所重如此興宗與王僧綽友善僧綽爲元凶所誅凶威方盛親故莫敢往興宗獨臨哭盡哀後爲侍中竟陵王誕據廣陵城爲逆事平興宗奉旨慰勞州別駕范義與興宗素善在城內同誅興宗至廣陵躬自收殮致喪還豫章舊墓孝武聞之甚不悅廬陵內史周朗以正言得罪鎖付寧州親戚故人無敢贍送興宗在直請急詣朗別帝知尤怒

後爲中書監左光祿大夫開府儀同三司常侍如故

孟詵嗣封臨波公南郡王義宣反問其子五兵尚書宜陽侯愷於尚書寺內著婦人衣乘問訊車投詡詡於妻室內爲地窟藏之事覺收付廷尉詡伏誅

蕭惠開爲益州刺史罷還京師府錄事參軍到希微負蜀人債將百萬爲債主所制未得俱還惠開與希微共事不厚以爲隨其同上不能攜接得還意耻之廐中凡有馬六十匹悉以給希微償債

許昭先伯舅夫妻並疫病死亡家貧無以送昭先賣衣物以營殯葬舅子三人並幼瞻護皆得成長本邑補主

簿固辭

董陽西陽人五世同財爲鄉邑所美

史無官

張進之永嘉固人爲太守王味之吏味之有罪當見收逃避投進之家供奉經時盡其誠力以本村淺近移入池谿味之墮水沉沒進之投水拯救相與沉淪危而得免

范叔孫吳郡錢塘人少而仁厚極窮濟急同里范法先
父母兄弟七人同時疫死惟餘法先病又危篤喪屍經
月不收叔孫悉備棺器親爲殯埋又同里施淵夫病疾
父母死不殯又同里范苗父子並亡又同里范敬宗家
內六人俱得病二人喪沒親隣畏遠莫敢營視叔孫並
殯塋躬卹病者並皆得全鄉曲貴其義行莫有呼其名
者世祖孝建初除竟陵王國中軍將軍不就

嚴世期會稽山陰人好施慕善出自天然同里張邁三

人妻各產子時歲饑儉慮不相存欲棄而不收世期間
之馳往拯救分食解衣以贍其乏三子並得成長同縣
俞陽妻莊年九十莊女蘭年七十各老病單孤無所依
世期衣飴之二十餘年死並殯墓宗親嚴宏鄉人潘伯
等十五人荒年饑死露骸不收世期買棺器殯埋存育
孩幼

徐耕晉陵延陵人元嘉二十一年大旱民饑耕詣縣陳
辭曰今年亢旱多稼不登民黎饑餒採掇存命聖上哀

於己垂存極但饑罄來以困殆者衆米穀轉貴糴索無
所方涉春夏日月悠長不有微救永無濟理不惟凡瑣
敢憂身外鹿鳴之求思同野草氣內之感能不傷心民
糴得少米資供朝夕志欲自竭義存分食今以千斛助
官賑貸此境連年不熟今歲尤甚晉陵境特爲偏枯此
郡雖弊猶有富室承被之家處處而是並皆保熟所失
蓋微陳積之穀皆有巨萬旱之所弊是鍾貧民溫富之
家各藏其財寶謂此等並宜助官得過儉月所損至輕

所濟甚重令敢自勵為勸造之端實願極水揚塵崇益
山海縣為言上當時議者以耕比漢卜式詔書褒美酬
以縣令

嚴成東海人王道東莞人大明八年東土饑旱成等各
以穀五百斛助官賑卹

史無官

王文和為征北義陽王暹府佐暹於彭城奔魏部曲皆
散文和獨送至界上暹謂曰諸人皆去卿有老母何獨
不去文和乃去

沈文季爲晉平王休祐驃騎長史休祐被殺雖用薨禮
僚佐多不敢至文季獨往墓展哀

劉休與陳郡謝儼爲友儼同丞相義宣反休坐匿之被
繫尚方七年乃得出

南齊杜淵少有世譽父卒淵持財與弟惟取書數千卷
爲司徒卒

劉善明平原人宋元嘉末青州饑荒人相食善明家有
積粟躬食饘粥開倉以救鄉里多獲全濟百姓呼其家

田爲績命田後至征虜將軍

虞棕初仕宋爲黃門侍郎宋明帝誅山陽王休祐至莖日寒雪厚三尺故人無至者惟棕一人來赴

劉璩字子珪宋末爲袁粲所薦除祕書郎不見用粲誅璩微服往哭并到聘助

何昌寓宋末爲建平王景素征北南徐州府主簿以風素見重母老求祿止爲湘東太守還爲高帝驃騎功曹昌寓在郡景素被誅昌寓痛之至是啓高帝理其寃又

與司空褚彥回書極言高帝嘉其義

王思遠宋末辟建平王景素南徐州主簿景素被誅左
右離散思遠親視殯塋手種松柏與廬江何昌寓沛郡
劉璉上表理之事感朝廷景素女廢為庶人思遠分衣
食以相資贍年長爲備筭總訪求素對傾家送遣又與
顧嵩之爲友嵩之卒後家貧思遠迎其妻子隱卹甚至
劉靈哲封霄城侯父懷珍卒當襲爵靈哲固辭以兄子
在虜中存亡未測無容越當茅土朝廷義之後至寧朔

將軍西陽王右軍司馬

吳達之姨亡無以葬自賣爲士夫客以營冢槨從祖弟敬伯夫妻荒年被畧賣江北達之有田十畝貸以贖之同財共宅

劉諷爲丹陽丞時始安王遙光記室崔慰祖與諷素善遙光據東府反慰祖在城內城未潰一日諷謂之曰卿有老母宜其出矣命門者出之慰祖詣闕自首繫尚方病卒

王績蜀郡人郝道福華陽人並累世同爨明帝詔表門
問蠲調役

譚宏寶零陵人何宏華衡陽人踈從四世同居共衣食
詔表門問蠲租稅

董僧惠爲晉安王子懋防閣子懋起兵徐玄慶既平子
懋知其豫子懋之謀執之僧惠曰晉安舉義兵僕實豫
議古人云非死之難得死之難僕得爲主人死不恨矣
願至主人大斂畢退就湯鑊雖死猶生玄慶義而許之

還具白明帝乃配東冶言及九江時事輒悲不自勝子
懋子昭基九歲以方二寸絹爲書參其消息并遺錢五
百以金假人崎嶇得至僧惠觀書對錢曰此即君書也
悲慟而卒

陸超之吳人以清淨閑雅爲晉安王子懋所知子懋既
爲于琳之所害人勸其逃亡荅曰人皆有死此不足懼
吾若逃亡非惟孤晉安之眷亦恐田橫客笑人徐玄慶
等以其義欲囚還都超之端坐待命其門生周姓者謂

殺超之當得重賞遂斬之

徐生東海人范安祖李聖伯范道根俱武陵人並五世同居

封延伯僑居東海三世同財爲此州所宗

邵榮興文獻叔並武陵人八世同居

陳玄子義興人四世同居戶口一百七人

韓靈敏早孤與兄靈珍並有孝性靈珍亡無子妻韓氏守節不嫁慮家人奪其志未嘗告歸靈敏事之如母

紀僧真宋末隨逐征西將軍蕭思話及子惠開皆被賞
遇惠開性苛僧真以微過見罰既而委任如舊及罷益
州還都不得志而僧真事之愈謹惠開臨終歎曰紀僧
真方當富貴我不見也乃以僧真託劉康周顯後除司

農卿

江泌字士清濟陽人也歷任南中郎行叅軍所給募吏
去後得時病莫有舍之者吏扶杖投泌泌親自隱郵吏
死泌爲買棺無僮役兄弟共與埋之

夏侯恭叔譙國人桓宗祖爲豫州辟爲主簿宗祖被誅
故人無敢至者獨恭叔以家財爲殯時人以此樂布

張融少爲封溪令兄與顧凱之有恩好凱之卒融身負
墳土在南與交阯太守卞展有舊展於嶺南爲人所殺
融挺身奔赴

梁陶季直初仕齊爲褚彥回司空司徒主簿彥回卒季
直請王儉爲彥回立碑終始營護甚有吏節時人美之
曹景宗爲雍州中兵叅軍督峴南與州里張道門厚善

道門車騎將軍敬兒少子也爲武陵太守敬兒誅道門於郡伏法親屬故吏莫敢入景宗自襄陽遣人船到武陵收其屍骸迎還殯葬鄉里以此義之

謝幾卿爲威戎將軍免官卒雖不持簡操然於家門篤睦兄才卿早卒子藻幼孤幾卿撫養甚至及藻成立歷清官皆幾卿獎訓之力也

鄭紹叔仕齊爲壽州治中從事時刺史蕭誕以弟誼誅臺遣收兵卒至左右莫不驚散紹叔聞難獨馳赴焉誕

死侍送喪柩衆咸稱之到京師司空徐孝嗣見而異之
曰祖逖之流也

樂藹任齊爲豫章王疑荊州主簿後疑還都藹後爲荊
州治中及疑薨藹解官赴喪率荆湘二牧故吏建碑墓
所

范雲好節尚竒專趨人之急少時與領軍長史王暕善
暕亡於官舍貧無居宅雲乃迎喪還家躬營殯殮後至
僕射

袁昂爲武陵王衛軍長史丁內憂服未除而從兄彖卒
昂幼孤爲彖所養乃制期服人有恠而問之者昂致書
以諭之曰竊聞禮繇恩斷服以情申故小功他邦加制
一等同喪有總麻之典籍孤子夙以不天幼傾乾廕資
敬未及過庭莫承藐藐冲人未達朱紫從兄提養訓教
示以義方每假其談價虛其聲譽得及人次實亦有繇
兼開拓房宇處以華曠同財共有資具取是爾來三十
餘年憐愛之至無異己生姊妹孤姪就居一時篤念之

深在終彌固此恩此愛畢壤不忘既情若同生而服爲
諸從言心即事實未忍安昔馬稜與弟毅同居毅亡稜
爲心服三年繇也之不除喪亦緣情而致制雖不及古
誠實感慕嘗願千秋之後從服暮齊不圖衰禍猥集一
旦草土殘息復罹今酷尋惟慟絕彌劇彌深今以餘喘
欲遂素志庶寄其罔慕之痛少伸無已之情雖禮無明
據乃事有先例率述而至必欲行之君問禮所歸謹以
誥白臨紙號哽言不識次

王份十四而孤解褐車騎主簿出爲寧遠將軍始安內史袁粲之誅親故無敢視者份獨往致慟繇是顯名

周捨初辟丹陽尹王亮主簿後爲鴻臚卿王亮得罪歸家時莫有至者捨獨敦恩舊及卒身營殯葬時人稱之楊公則爲散騎常侍爲人敦厚慈愛居家篤睦視兄子過於其子家財悉委焉

顏協爲兼御史中丞協幼孤養於舅氏陳郡謝暕暕卒協以有鞠養之恩居服如伯叔之禮議者重焉

庾詵隣人有被誣爲盜者被治刻妄款詵矜之乃以書質錢二萬令門下詐爲親代之酬備隣人獲免謝詵曰吾矜天下無辜豈期謝也其行多如此類卒謚貞白處士

阮孝緒字士宗父彥之宋太尉從事中郎孝緒七歲出

從伯裔之

裔字本作太
祖廟諱下字

裔之母周卒有遺財百餘萬應

歸孝緒孝緒一無所納盡以歸裔之姊瑯邪王晏之母聞者咸歎異之卒謚文貞處士

劉璠爲上黃候曄所知及曄終於毗陵故吏多分散璠獨奉曄喪還都墳成乃退簡文時在東宮遇曄素重諸不送者皆被劾責惟璠獨被優賞

度泳兄子仲容幼孤泳養之仲容初爲安西法曹行參軍泳時已貴顯吏部尚書徐勉擬泳子晏爲官僚泳垂泣曰兄子幼孤人才粗可願以晏嬰所忝迴授之許焉因轉仲容爲太子舍人

孫謙力於仁義行已過人甚遠從兄靈慶嘗病寄於謙

謙出行還問起居靈慶曰向飲冷熱不調即時獨渴謙
退遣其妻有彭城劉融者行乞疾篤無所歸求人與送
謙舍謙開廳舍以待之及融死以禮殯葬之衆咸服其
行義終光祿大夫

劉凝之南郡枝江人隱居不仕荊州饑衡山王義季慮
凝之餒斃餉錢十萬凝之大喜將錢至市門觀有饑色
者悉分與之俄頃立盡

何點字子哲齊永元中崔惠景圍城人間無新點悉伐

園樹以贍親黨累徵不就

任昉爲新安太守卒事兄嫂恭謹外氏貧缺嘗營奉供
養祿俸所收四方饋遺皆班之親戚即日便盡

庾黔婁爲鄧元起益州長史元起死于蜀部曲皆散黔
婁身營殯殮携持喪柩歸鄉里

龔愜遂寧人爲劉季連益州主簿後季連兵敗還京師
將發人莫之視惟愜送馬

褚裒錢塘人南康王子會理之舊會理欲圖侯景事敗

冕亦囚於省問事之所起拷掠干計終無所言會理隔
壁聞之遙曰褚郎卿豈不爲吾致此耶然勿言會理遇
害冕竟以不服赦之

歐陽頎爲天門太守與左衛將軍蘭欽相善欽征交州
頎同行欽度領以疾終頎除臨賀內史啓乞送欽喪還
都然後之任

陳周文育本姓項氏義興人周蒼養爲己子同州刺史
陳慶之與蒼同郡素相善啓蒼爲前將軍軍主慶之使

將五百人往新蔡縣勸慰蔡白水蠻謀執奮以入魏事
覺與文育拒之時賊徒甚盛一日之中戰數十合文育
前鋒陷陣勇冠軍中奮於戰陣死文育馳取其屍賊不
敢逼及夕各引去文育身被九創創愈辭請還葬慶之
壯其節厚加贈遺而遣之

吳明徹初仕梁東宮直後及侯景寇京師天下大亂明
徹有粟麥三千餘斛而隣里饑餒乃白諸兄曰當今草
竊人不圖久柰何有此而不與鄉家共之於是計口平

分同其豐儉羣盜聞而避焉賴以存者甚衆後爲侍中
司空南平郡公

杜之偉幼精敏有逸才湘陰侯蕭昂爲江州刺史以之
偉掌記室昂卒廬陵王續代之又手教招引之偉固辭
不應命乃送昂喪柩還京

司馬高梁承聖中爲太子庶子江陵陷隨例入關而梁
室屠戮太子瘞殞失所高以官臣乃抗表周朝求還江
陵改葬辭甚酸切周朝優詔荅曰昔主父從戮孔車有

長者之風彭越就誅樂布得陪臣之禮庶子鄉國已改
猶懷送往之情始驗忠貞方知臣道即勅荊州以禮安
厝

許亨梁末爲王僧辨太尉從事高祖受禪授中散大夫
領羽林監初僧辨之誅也所司收僧辨及其子顏於方
山同坎瘞埋至是無敢言者亨以故吏抗表請葬之乃
與故義徐陵張種孔覆等相率以家財營葬具凡七柩
皆改窆焉

陳智深爲蕭摩訶騎士及摩訶入隋授開府儀同三司
與漢王諒同作逆伏誅其子光已籍沒智深收摩訶屍
手自殯歛哀感行路君子義之

殷不佞字季仰陳郡長平人第三兄不疑次不占次不
濟並早亡不佞最小事第二寡嫂張氏甚謹所得祿俸
不入私室終於右丞散騎常侍

後魏粟法光上黨屯留人素敦信義中山王熙誅弟畧
潛行自託舊識河內司馬始賓始賓便爲荻筏夜與俱

渡盟津詣法光家法光忻而納之畧舊識乃雙爲西河
太守復歸之停止經年雙乃令從子昌送畧渡江蕭衍
甚敬禮之

崔寬爲鎮西將軍卒初自隴右歸世祖見司徒崔浩
與齒次厚存撫之及浩誅以疎族獨得不坐遂家於武
城居祖魏司空林舊墟以一子繼浩弟覽妻封氏相奉
如親

長孫稚初生而母亡爲姨兄元洪超所養後爲太傅錄

尚書事封開國子稚表請迴授洪超次子憚許之

刁整爲驍騎將軍丁父憂相州刺史山陽王熙在鄴起
兵將誅元乂等事敗傳首京師熙之親故莫敢視整弟
婦卽熙姊遂收其屍藏之後乃還熙所親元畧曾於整
坐泣謂黃門王誦尚書袁翻曰刁公收斂我家卿卽宜
知

房景遠字叔遐重然諾好施與頻歲凶儉分贍宗親又
於通衢以食餼者存濟甚衆以母疾不應州命

常肱字尊顯少有志業年十八辟州主簿時屬歲荒儉
肱發家粟造粥以飼饑人所活甚衆

盧義信范陽涿人少時幽州頻遭水旱先有穀數萬石
貸民義信以年穀不熟乃燔其契州閭悅其恩德

邢晏篤於義讓初爲南兗州刺史例得一子解褐乃啓
其孤弟子子慎爲奉朝請子慎年甫十二而其子已弱
冠矣後爲滄州復啓孤兄子子昕爲府主簿而其子並
未從官世人以此多之

鄭罷高陽人中書學生盧度世以崔浩事棄官逃於罷
家罷匿之使者囚罷長子將加箠楚罷戒之曰君子殺
身以成仁汝雖死勿言子奉命雖被拷掠至乃火熬其
體因以物故卒無所言度世後令弟娶罷妹以報其恩
盧度世爲濟州刺史國家初平升城太守房崇母傅氏
度世繼外祖母兄之子婦也兗州刺史申纂妻賈氏崇
之姑女也皆亡破軍途老病憔悴而度世推計中表致
其恭恤每觀見傅氏跪問起居隨時奉送衣被食物亦

存賑賈氏供其服膳青州既陷諸崔墜落多所收贖度
世子淵暴等父母亡後同居共財自祖至孫家內百口
在雒時有饑年無以自贍然尊卑恪穆豐儉同之

高允少孤夙成有竒度年十餘歲奉祖父喪還本郡推
財與二弟爲沙門名法淨未久而罷後爲尚書散騎常
侍獻文平青齊徙其族望於代時諸士人流移遠至率
皆饑寒徙人之中多允姻媾皆徒步造門允散財竭產
以相贍賑慰問周至無不感其仁厚初尚書竇瑾坐事

誅瑾子遵亡在山澤遵母焦沒入縣官後焦以老得免
瑾之親故莫有恤者允愍焦年老保護在家積六年遵
始蒙赦其篤行如此高聰生而喪其祖母王撫育之大
軍攻尅東陽聰徙入平城與蔣少

游同為雲中兵戶窘困無所不
至族祖允視之若孫大加明急

林白奴京兆儒生時姑臧段暉因慕容瓚內附暉歸國
大武以為上客從至長安有人告暉欲南奔帝斬之於
市暴屍數日白奴歛暉德音夜竊其屍置之枯井暉女
為燉煌張氏婦女而聞之乃向長安收葬

崔挺爲北海王司馬三世同居門有禮讓後值饑年家
始分析挺與弟振推讓田宅舊資惟守墓田而已家徒
壁立兄弟怡然

楊標字顯進正平高涼人少豪俠有志氣孝昌中爾朱
榮殺害朝士大司馬城陽王元徽逃難標藏而免之孝
莊帝立徽乃出復爲司州牧繇是標以義烈聞

陽猛上雒人爲大谷鎮將元顥入雒孝莊帝渡河范陽
王誨脫身投猛猛保藏之及孝莊反正繇是知名俄而

廣陵王恭僞瘖疾復來歸猛猛亦深相保護孝武即位甚嘉之授征虜將軍行河北郡守

張亮少有幹用初仕爾朱兆拜平遠將軍以功封隰城縣伯邑五百戶高祖討兆於晉陽兆奔秀容兆左右皆密通誠款惟亮獨無啓疏及兆敗竄於窮山令亮及蒼頭陳山隄斬兆首以降皆不恣兆乃自縊於樹

鄭仲明滎陽人爾朱榮入雒彭城王邵以子韶寄仲明仲明尋爲城人所殺韶因亂與乳母相失遂與仲明兄

子僧副避難雒中爲賊逼僧副恐不免因令韶下馬僧
副謂賊曰窮鳥投人尚或矜愍况諸王如何棄乎僧副
舉刀逼之賊乃退韶逢一老母姓程哀之引於私家居
十餘日莊帝訪而獲焉襲封彭城王

山偉爲中書令有弟少亡偉撫寡訓孤同居二十載恩
義甚篤

明亮爲陽平太守屬相州刺史中山王熙引兵討元乂
時并州刺史城陽王徽亦遣使詣亮密同熙謀熙敗亮

詭其使辭繇是徽竟獲免

張謙妻皇甫氏被掠賜中宮爲婢皇甫遂乃詐癡不能梳沐後謙爲宋冀州長史因貸千餘疋購求皇甫高宗怪其納財之多也引見之時皇甫年垂六十矣帝曰南人竒好能重室家之義此老母復何所任乃能如此致費也皇甫氏歸謙令諸妾境上奉迎數年卒

畢衆敬爲兗州刺史寧南將軍篤於姻類深有國士之風張謙之亡也躬往營視有若至親

王衍爲侍中車騎將軍篤於交舊有故人竺毓於西充
州爲仲遠所害其妻子饑寒行置之於家累年贍卹世
人稱其敦厚

甄密叅中山王英軍事英鍾離敗還鄉人蘇良沒於賊
手密盡私財以贖之良既傾資報密密一皆不受謂良
曰濟君之日本不求貨非相贈之意也

馮亮博覽諸書又篤好物理中山王英平義陽而獲焉
英素聞其名以禮待接亮至雒隱居嵩山感英之德以

時展覲及英亡亮奔赴盡其哀慟

刁冲渤海人爲裴植故吏植爲度支尚書與僕射郭祚都水使者韋雋等同時見害於後祚雋事雪加贈而植追復封爵而已冲上疏訟之於是贈植征南將軍尚書僕射揚州刺史乃改葬植

夏侯道遷初自南齊歸國封濮陽侯食千戶道遷以板漢中歸誠本繇王穎興之計求分邑戶五百封之宣武不許靈太后臨朝道遷重求分封太后大奇其意議欲

更以三百戶封穎興會卒遂寢

陽固爲清河王懌太尉從事中郎屬懌被害元乂秉政朝野震悚懌諸子及門生寮吏莫不慮禍隱避不出素爲懌所厚者彌不自安固以嘗被辟命遂獨詣喪所盡哀慟哭良久乃還僕射游肇聞而歎曰雖欒布王修何以尚也君子哉若人

張普惠初爲任城王澄所知及爲諫議大夫澄薨普惠吏民之義又荷其恩待朔望奔赴至於禫除雖寒暑風

雨無不必至又好有進舉敦於故舊冀州人侯堅固少時與其游學早終其子長瑜普惠每於四時請祿無不減贍給其衣食及爲豫州啓長瑜解褐攜其合門極給之

劉仁之爲西兗州刺史性愛好文史敬重人流與齊州馮元興交款元興死後積年仁之營視其家嘗出隆厚時人以此尚之

祖瑩性爽俠有節氣士有窮厄以命歸之必見存極時

亦以此多之至護軍將軍

汲宗交州人爲杜超故吏超密皇后之兄也後從弟遺子元寶謀反伏誅時朝議欲追削超爵位中書令高允上表理之宗與故吏等以超子道雋坐爵受誅委骸土壤求得收葬書奏詔義而聽之贈超散騎常侍安南將軍南康公謚曰昭

馮熙生於長安爲姚氏魏母所養以叔父樂陵公邈因戰入蠕蠕魏母攜熙逃避至氐羗中撫育年十二好弓

馬有勇幹氏羗皆歸附之魏母見其如此將還長安始就學士學從師受孝經論語好陰陽兵法後授內都大官太師熙事魏母孝謹如事所生魏母卒乃散髮徒跣水漿不入口三日詔不聽服熙表求依趙氏之孤孝文以熙情難奪聽服齊衰期

崔巨倫以宣武挽郎除冀州鎮北府墨曹參軍太尉記室參軍叔楷爲殷州巨倫仍爲長史在州陷賊歛恤亡存爲賊所義後逃歸雜授別將北討初楷喪之始巨倫

收殯倉卒事不周固至是遂偷路改殯并竊家口以歸
吳悉達雖於儉年糊餽不繼賓客經過必傾所有每守
宰殯喪私辦車牛送終塋所隣人孤貧困窘者莫不解
衣輟糧以相賑恤鄉閭五百餘人詣州稱頌焉有司奏
聞標閭復役以彰孝義

馬人龍輕財重義友人尹靈哲在軍喪亡人龍聞即奔
赴負屍而歸以家財殯葬爲制總服撫其孤遺恩如所
生州郡高龍詔表門閭

杜纂字紫孤嘗山九門人少以清苦自立縣令齊羅喪
亡無親屬收瘞纂以私財殯塋繇是郡縣標其門閭
高遵字世禮父濟陰太守遵賤出其兄矯等嘗欺侮之
及父亡不令在喪位遵遂馳赴平城歸從祖兄中書令
允允乃爲遵父舉哀以遵爲喪主京邑無不吊集朝貴
咸識之徐歸奔赴免喪允爲營官路得補樂浪王侍郎
遵感成益之恩事允如諸父

趙令安孟蘭強天水白石人並四世同居行著州里

王閭北海密人數世同居有百口

劉業興大山人四世同居

蓋攜都郡人六世同居並共財產家門雍睦鄉里敬異
石文德中山蒲陰人有行義真君初縣令黃宣在任喪
亡宣單貧無期親文德祖父苗以家財殯葬持服三年
奉養宣妻二十餘載及亡乃衰經斂祔率禮無闕自苗
逮文德刺史守令卒官者制服送之五世同居門庭雍

睦

石祖興嘗山九門人太守田文彪縣令和真等喪亡祖
興自出家絹二百餘疋營護喪事州郡表列高祖嘉之
張烈爲順陽太守以母老歸養積十餘年頻值凶儉烈
爲粥以食饑人蒙濟者甚衆鄉黨以此稱之

李幾博陵安平人七世同居共財家有二十二房一百
九十八口長幼濟濟風禮著聞至於作役卑幼競進鄉
里嘆美標其門閭

張安祖襲世爵山北侯有元承貴曾爲河陽令家貧且

赴尚書求選逢天寒甚遂凍死路側一子幼停屍門巷
棺殮無託安祖悲哭盡禮買木爲棺手自營作斂殯周
給朝野嘉歎尚書聞奏標其門閭

汲固東郡梁城人爲兗州從事刺史李式坐事被收吏
人皆送至河上時式子憲生始滿月式大言於衆曰程
嬰杵臼何如人也固曰今古豈殊遂便潛還不復顧徑
來入城於式婦閨抱憲歸藏及捕者收憲屬有一婢產
男母以婢兒受之事尋泄固乃攜憲逃道遇赦始歸憲

即爲固長育至十餘歲嘗呼固夫婦爲郎婆後高祐爲
兗州刺史嘉固節義以爲主簿

劉侯仁豫州人郡人白早生殺刺史司馬悅據城南叛
悅息肱走投侯仁賊雖重加購募又嚴其誣楚侯仁終
無漏泄肱遂免禍事寧有司奏其操行請免府藉叙一
小縣詔可

邵洪哲上谷沮陽人縣令范道榮先自胸城歸款乃除
縣令道榮鄉人徐孔明妄經公府訟道榮非勲道榮坐

除名羈旅孤貧不能自理洪哲不勝恚憤遂代道榮詣
京師明申曲直經歷寒暑不憚勤勞道榮卒得復雪又
北鎮反亂道榮孤單無所歸附洪哲兄伯川復率鄉人
來相迎接送達幽州道榮感其誠節訴省申聞詔下州
郡標其里閭

冊府元龜卷八百三